



*Kamis, 29 April 2021*

**Ogen: Ester 4:15-17**



Pang Erpasang



**P**ernah lit kalak erbelas nina 'pang kal ia erpasang'. Belas-belas enda banci jadi reh ibas penatap kalak sideban kerna kegeluhen sekalak jelma. Biasana adi ibas erjuma ndai, la ia biar-biaren mpedarat modal si melala, adi kin erbisnis ndai banci saja asakai pe iberena ntah alu ngeraih ku bank. Enda jadi erkiteken mbelin pengarapenna maka berhasil kai si ilakokenna e. Alu kata sideban ngarap kal ia arah kai siilakokenna banci seh sura-sura. Ibas dampar sideban lit kalak erpengakap bagi 'gambling' erjudi. Adi rulih luar biasa belinna ulihna tapi adi lang, banci saja keru sinasa lit.

Kecibal kalak Jahudi paksa i Persia, itaban la terjeng sie saja, ibas situasina pe ipertakiken kalak atena ia. Lit si Haman gelarna, enggo ersura-sura ndarami kesalahen kalak Jahudi khususna si Mordekhai sabab Mordekhai enggo nanemken ngaruhna man Raja Ahasweros arah nehken man Ester sura-sura kalak si atena munuh raja. Kenca Haman iangkat jadi perdana menteri, ia mesikel kal i hamati tapi Mordekai la bage emaka idaramina cara gelah banci iukum mate kalak Jahudi alu ndatken stempel cincin raja.

Ibas situasi sibage me kalak Jahudi alu pimpinen Ester ras Mordekhai ertoto, erpuasa telu wari telu berngi dekahna. Janah Ester ersura-sura ngadap raja guna mindo perkuah ate amin mbelin kal resiko siiadapina sabab labo banci ia ngadap raja adi la kin idilo raja ia, banci saja mate iukum me ia. Amin bage belinna resiko siman alankenna, pang ia erpasang guna keselamatan bangsana. Sienda banci jadi erkiteken ersada kerina arih bangsa enda mindo man Dibata.

La sitik kita ibas ndalani geluhta pe 'pang erpasang' arah lebe subuk ibas perbahanen, pengerana guna kiniulin jabu, perpulungenta. Ibas sie tentuna penampat Dibata me siarapken kita alu tetap mindo arah pertotonta.